

Mengejar baki fadilat Ramadan

Oleh AZRUL AZLAN

ISKANDAR MIRZA

"SESUNGGUHNYA Allah menghitung kebaikan-kebaikan dan kejahatan-kejahatan, kemudian dijelaskan lagi, barang siapa yang berniat (untuk melakukan) kebaikan dan masih tidak melaksanakannya, (maka) Allah menulis baginya kebaikan yang sempurna. Dan barang siapa yang berniat (untuk melakukan) kebaikan dan kemudian melaksanakannya, maka Allah menuliskan baginya sepuluh kebaikan hingga 700 kebaikan, dan berkali-kali ganda banyaknya. Dan barang siapa yang berniat (untuk melakukan) kejahatan tetapi tidak melaksanakannya, Allah akan menulis baginya kebaikan yang sempurna. Dan barang siapa yang berniat (untuk melakukan) kejahatan dan melaksanakannya, (maka) Allah menulis baginya satu kejahatan (sahaja)." - hadis riwayat Bukhari, Muslim, Musnad Ahmad.

Hadis ini menjelaskan fadilat Allah yang luas rahmat kepada tiap-tiap hamba-Nya. Di dalam hadis ini, yang sangat menyentuh perasaan ialah Allah meletakkan kebaikan yang sempurna walaupun kita berniat jahat pada asalnya!

Hebatnya rahmat Allah kepada manusia. Berniat baik walaupun tanpa melakukannya telah dikira satu kebaikan sempurna. Kadang-kadang kita memikirkan mengapa orang yang berniat melakukan kejahatan dan kemudian melakukannya hanya diberikan balasan satu kejahatan sahaja. Sewajarnya orang melakukan kejahatan ini digandakan bentuk pembalasannya. Inilah yang dinamakan sebagai fadilat, rahmat dan ihsan Allah. Allah menyeru kepada kita tentang kebaikan dan memberikan peluang orang yang melakukan kejahatan untuk menebus kesilapannya.

Mencecah

Terdapat kebaikan-kebaikan yang Allah berikan kepada manusia sehingga berganda-ganda mencecah lebih 700 kali. Contohnya, bersedekah harta di jalan Allah, derma, membantu menegakkan dan mempertahankan kesucian Islam, menyatukan umat. Allah menyatakan di dalam al-Quran *Perumpamaan orang yang menafkahkan harta mereka di jalan Allah, dahan putik itu terdapat 100 tangkai. Dan Allah menggandakan (ganjaran itu) sebagaimana kehendak-Nya. Dan Allah Maha luas lagi Maha Mengetahui.* - Al-Baqarah, 261.

Serendah-rendah pahala dan ganjaran Allah adalah sepuluh kebaikan. Firman Allah Taala *"Barang siapa yang datang (melaksanakan) kebaikan, maka padanya (ganjaran) 10 kebaikan seumpamanya. Barang siapa yang datang (melaksanakan) kejahatan, maka dia tidak akan dibalas kecuali (satu) kejahatan (sahaja) seumpamanya dan tidaklah mereka itu dizalimi."* - Al-An'am, 160

Di bulan Ramadan, terdapat keistimewaan beramal yang pernah dinyatakan oleh Rasulullah s.a.w. di dalam hadis Qudsi *"Setiap amalan anak Adam itu akan digandakan sepuluh yang seumpama dengan amalan tersebut kecuali berpuasa. Sesungguhnya bagi yang berpuasa, Aku sendiri akan memberikan ganjarannya."*

Ini bermakna Allah sendiri akan menggandakan ganjaran bagi mereka yang berpuasa. Keistimewaan itu bukan pengecualian, tetapi ganjaran tambahan buat yang beramal. Kesempatan Ramadan yang berbaki hendaklah diperteguhkan cita-cita mencapai tahap takwa kepada Allah. Biarlah separuh Ramadan yang kita lalui ini mendapat momentum baru untuk berubah dan menuju kepada kebaikan. Kita masih mempunyai tempoh separuh lagi Ramadan untuk mengukuhkan diri, agar setelah tamat bulan ini kita mampu untuk beristiqamah dengan kebaikan di luar bulan Ramadan.

Teruskan usaha mengejar amal kebaikan untuk menebus semua kesilapan kita yang lampau.